

四庫全書

史部

欽定四庫全書

欽定重訂大金國志卷二十八

文學翰苑上

宇文虛中

宇文虛中字叔通成都人宋黃門侍郎以奉使見留仕
為翰林學士承旨皇統初南人多在上京謀奉虛中為
帥奪兵仗南奔事覺詔繫獄先是虛中在朝語言諧謔
諸貴族大臣久不平之乃煅煉所藏圖書為反具虛中

歎曰死自吾分至於圖籍南來士大夫家例有之如高待制士諱圖書尤多豈亦反邪有司承風旨并寘士諱極刑人至今寃之

蔡松年

蔡松年字伯堅父靖宋季守燕山仕金為翰林學士松年行臺尚書省令史出身官至尚書右丞相鎮陽別業有蕭閒堂自號蕭閒老人卒謚文簡

蔡珪

蔡珪字正甫松年子也七歲賦菊詩語意驚人天德二

年

按中州集
作三年

進士擢第歷澄州判官三河簿正隆三年

銅禁行官得三代以來鼎鐘彝器無慮千數禮部官以

珪博物且識古文奇字辟為編類官丁父憂起復翰林

修撰同知制誥改戶部員外郎太常丞朝廷稽古禮文

之事取其議論為多大定十四年由禮部郎中出守維

州道卒有續歐陽文忠公集古錄金石遺文燕王墓碑

辨等書傳於世

高士談

高士談字子文

按中州集云
一字季默

宋高瓊之後宣和末任忻

州戶曹任金為翰林直學士皇統初死字文之禍有蒙
城集行於世子公根亦有詩名

馬定國

馬定國字子卿荏平人少時志趣不凡宣政末題詩酒

家壁有蘇黃不作文章伯章蔡

按中州集
作童蔡

翻為社稷臣

之句用是得罪而名亦顯天眷年間遊歷下亭以詩撼

劉豫豫與語大悅授監察御史仕至翰林學士石鼓自唐以來無定論定國以字畫考之云是宇文周時所造作辨萬餘言出入傳記引據甚明號齋堂先生

施宜生

施宜生字明望福建建州之建陽人

按中州集
浦城人

宣和末

為潁州教官後任齊又任金官至翰林學士正隆中嘗

奉使於宋自號三任老人

按宜生使宋洩國謀
歸為介所告烹死

郝侯

郝侯字子玉太原人正隆二年進士仕至河東北路轉運使有詩云功名角上無多地風月壺中自一天子居

簡亦有詩名居中樞密院令史出身正大末除鳳翔府

治中南山安撫使詩亦甚工子玉號虛舟居士按原書此句無

子玉二字則以號虛舟居士屬於其子居中殊失事實今據中州集補正

李晏

李晏字致美高平人按中州集云父森字彥實工詩有云少年日日

醉花邊短白長紅一一憐自笑老來心尚在惡風常廢

五更眠又賦梅云水骨有香魂乍返玉顏無暈酒全消
皇統二年晏登進士釋褐積遷至翰林學士高文大冊
號稱獨步拜御史中丞初遼人掠中原及得奚渤海諸
國生口分賜貴近或有功者大至一二州少亦數百皆

為奴婢輸租於官且納課給其主謂之二稅戶

按原書此四字

作課之二文義訛脫今據中州集改正

至大定初一切稅戶皆免為民獨

間山守僧賜戶三百與僧共居供役而不輸租故不在
免例訴者積年臺寺不為理又訴於晏晏上章畧云天

子作民父母胥吏弄法舞文沙門既謂出家可與男女雜居乎書奏宰相持不可世宗詔晏與相詰難晏伏御

座前曰

按原書無御座二字據中州集補

前日車駕幸遼東閭山寺僧

曾供從官一宿之具寺僧物即陛下物也陛下無以此直寺僧而使三百家受屈世宗笑曰李晏劫持我邪即日免之明昌初為禮部尚書分諸道府試復經義設童科皆自晏發之出為沁南軍節度使力辭改昭毅軍節度使子仲畧仕至山東路按察使

王寂

王寂字元老薊州玉田人天德三年進士興陵朝以文章政事顯終於中都路轉運使卒謚文肅有拙軒集北遷錄傳於世

劉昂

劉昂字之昂興州人大定十九年進士是時昂有聲場屋其律賦自成一家輕便巧麗差有捷法早年得任省掾考滿授平涼路轉運副使昂作詩得晚唐體尤工絕

句往往膾炙人口張秦娥者頗能小詩其賦遠山云秋水一抹碧殘霞幾縷紅水窮霞盡處隱隱兩三峯其後流落昂贈詩云遠山句好畫難成柳眼才多總是情今日衰顏人不識倚爐空聽煮茶聲又云二頃山田半欲蕪子孫零落一身孤寒窻昨夜蕭蕭雨紅日花梢入夢無秦娥為之泣下章宗朝自國子司業遷左司郎中以

言事降上京留守判官道卒

按金史云掌書大中與賈銓滿言除授事為言者所

勅辭連昂降官中州集云遼陽人大中欲強執政賈銓為言者所勅辭連昂降官此云以言事降官其說皆頗

不
同

楊雲翼

楊雲翼字之美樂平人明昌五年經義進士第一人詞賦亦中乙科宣宗頻歲南伐事勢有決不可者議論之際時相多以避嫌不敢言雲翼獨極諫以為兩淮生靈皆陛下赤子不能外禦北兵而取償於宋以天下為度者不如是也是後再出兵時全軍幾為宋所覆宣宗悔悟責主兵者曰我當何面目見楊雲翼邪興定未拜吏

部尚書中外望其入相竟以足疾不果正大五年終於

翰林學士諡文獻

按金史云為禮部尚書兼侍讀卒

史肅

史肅字舜元京兆人僑居北京之和衆業科舉為名進士歷赤縣及幕官入為監察御史遷治書出刺通州大定黨獄起為所絀謫靜難節度副使太安初名為中都路轉運副使超戶部正郎復坐鐫降同知汾州卒於官肅尚理性之學屏山學佛

按李純甫自號屏山居士

自肅發之高才

博學作詩精緻有理尤善用事古賦亦奇峭有詩集號
澹軒遺藁云

蕭貢

蕭貢字真卿咸陽人大定二十二年進士自涇州觀察
判官名補省掾不四五月拜監察御史累遷右司郎中
預修泰和律令所上條畫皆委曲當上心興陵嘉嘆曰
漢有蕭相國我有蕭貢刑獄吾不憂矣又奏死囚獄雖
已具仍責家人伏辨以申寃抑詔從之遷刑部侍郎入

謝曰臣願因是官廣陛下好生之德上大悅凡貢所平
及多從之歷大興尹德州防禦使知大名府陝西轉運
使河東北路按察轉運使靜南軍節度使南京都轉運
使御史中丞以戶部尚書致仕卒謚文簡有注史記百
卷公論等文行於世

李通

李通字平甫樂城人明昌二年進士泰和中為大興幕
官時呼沙呼知府事賣權恃勢奴視同列通每以公事

相可否不少假借又摘其陰事數十條欲發之呼沙呼
謀篡者也聲勢焰焰人莫敢仰視乃為一書生所抗積
不能平先以非罪誣染之幾至不測雖有以自解竟坐
是任宦不進以東平治中致任閒居陽翟十餘年號寄
菴先生臨終戒家人曰吾明日歸矣而輩慎勿遽哭果
如期而逝家人哭不禁良久開目曰戒汝等勿哭致令
我心識散亂言畢目復瞑其明了如此適工畫山水龍
虎亦入妙品皆得先輩不傳之秘平生詩文甚多如云

舊管新收粧鏡在昨非今是酒盃乾贈筆工云工不能書何以筆士須知筆乃能書皆佳句也

馮延登

馮延登字子駿吉州人承安三年進士為寧邊令適趙秉文守此州與之考論文義相得甚歡故延登詩文皆有律度正大末奉命北使見留使招鳳翔不從欲殺者久之割其鬚髯羈管豐州二年乃得還天興初元投禮部侍郎京城陷自投井中詩文最工隆安道中元日題

云山岡重複三竿日溪路縈迴一帶天老境飄零情更
惡又從馬上得新年

梁持勝

梁持勝字經甫絳州人父襄大定初進士質直尚義有
古人風仕至保大軍節度使有諫世宗田獵表傳於世

按原書無父襄二字考金史自大定初以下至此實係持勝父襄事今補泰和六年持勝復

試進士制策優等宏辭亦中選貞祐初由太學博士為
咸平治中宗室承裕辟為僚佐承裕死太平謀不軌以

兵脅持勝作文移持勝不從大罵即日遇害

按金史持勝傳遷咸

平路宣撫經歷時宣撫官森萬努有異志欲棄咸平徙海蘭路持勝力止之萬努怒杖之八十走告上京行省

太平太平實與通謀口稱其忠而心不然之署為左右司員外郎既而太平受萬努命焚毀上京宗廟執元帥

承九奪其軍持勝密約咸平治中賈摩賽不萬戶韓公怒共殺太平復推承克行省事同伐萬努事泄俱被害

蓋其事之本末如此此所載簡略不明又文言為宣撫經歷此言為咸平治中史言元帥承克此言承裕史言

持勝欲殺太平雅承克而見害此言承裕死太平脅持勝作文移不從而見害其說皆不同皆當以史為確

時年三十六贈韓州刺史初赴官有詩云山雲欲雨花

先慘客路無人鳥亦悲以為讖云

馮璧

馮璧字叔獻承安二年進士歷州縣召入翰林再為曹郎宣宗朝屢以使指劾大獄其時權貴如歸德知府宿

州總帥

按金史完顏綱傳貞祐二年為行院簽樞密院兼知歸德此云歸德知府疑謂綱也又歸潛志

云韓舍哩約赫德鎮宿數年屢破宋兵然跋扈不受朝廷制此云宿州總帥即謂約赫德也

聲勢焰

焰朝廷知其跋扈而不能摧伏者璧以法臨之毛髮不貸也幼有重名不畏強禦興定末以同知集慶節度使事致仕居嵩山龍潭者十餘年放浪山水間人望以為

神仙題明皇擊梧桐圖云三郎耳譜起花奴風調才情
信有餘天寶錯來非一拍霓裳中節亦區區詩文行於
世者最多北渡還鄉里年七十九而終

韓玉

韓玉字溫甫其先相人其後北遷為漁陽人明昌五年
經義詞賦兩科進士入翰林為應奉一日應制百篇文
不加點又作元勳傳稱旨章宗歎曰勳臣何幸得此人
作傳耶泰和中建言開通州潞水漕渠船運至都陞兩

階授同知陝西東路轉運使事大安三年都城受圍夏人連陷邠涇陝西帥司檄玉為都統府募軍旬日得萬人籍秦州場買馬官香及鳳翔冒買馬七百寶雞埋沒官鐵他州郡弓弩數千以給軍出屯華亭與夏人戰敗之獲牛馬千餘時夏人五萬方圍平涼又戰於北原夏人疑大軍至是夜解去當路者忌其功驛奏玉與夏人有謀朝廷疑之使使者授玉河平軍節度使且覘其軍先是華州李公直以都城隔絕謀舉兵入援而玉恃其

軍為可用亦欲為勤王之舉乃傳檄州郡云始是賊臣
貪容奸賂繼緣二帥貪錮威權既止夏臺之師旋至會
河之敗又云人誰無死有臣子之當然事至於今忍君

親

按原書作坐視於屬對殊
疎據中州集及歸潛志改

而弗顧勿謂百年身後虛

名一聽史臣只如今日目前何顏以居人世

按原書脫
日前以下

八字據中州集
及歸潛之補

其後京兆統軍以謀及誅公直井及於

王玉赴官道出華州被囚死於郡學

按歸潛志云收鞠
死獄中與此不同

欽定重訂大金國志卷二十八

欽定四庫全書

欽定重訂大金國志卷二十九

文學翰苑下

王若虛

王若虛字從之橐城人承安二年經義進士釋褐鄜州
錄事歷門山令入翰林自應奉轉直學士居冷局十五
年崔立之變羣小獻諂為立起功德碑以都堂命名若
虛若虛外為遜辭而實欲以死守之時議稱焉北渡後

居鄉里癸卯三月登泰山憇於黃峴峯之萃美亭談笑而化若虛少負海內重名而不立崖岸滑稽多智而以雅重自持誠可為一時名流矣

麻九疇

麻九疇字知幾莫州人

按金文云易州人

三歲識字七歲能草

書作大字有及數尺者故所至有神童之目章宗召見問汝入宮中亦懼否對曰君臣父子也子寧懼父邪章宗大奇之弱冠住太學有聲場屋間南渡後讀書北陽

山中興定末府試經義第一詞賦第二省試亦然

按金史及

歸潛志九疇者試雖居首而廷試以換照故正大三年乃賜及第

正大三年公卿連薦

九疇可試館職乃賜及第授太祝權太常博士應奉翰林文字九疇天資野逸高蹇自便壬辰歲遇亂卒

高庭玉

高庭玉字獻臣思州人大定末進士章宗衛王朝甚有時名為人豪傑尚氣節一時名士多歸之貞祐初自左

右司郎官出為河南府治中與知府復興

按歸潛志云
溫德亨禍興

屢以公事相可否時都城受圍使驛阻絕復興為安撫副使懼庭玉謀已乃以造逆拘訊之庭玉就逮龐才卿雷希顏王士衡辛敬之

按龐才卿名鑄雷希顏名淵王士衡名權辛敬之名愿皆

被羅織幾有一網之禍比赦至庭玉瘐死

張萬公

張萬公字良輔東阿人正隆二年進士仕長山令有惠

政人為立祠入為右司員外郎太師潘王愛之

按金史圖克坦

克寧為太師封潘王許以宰相器明昌初遷御史中丞以言事忤

旨除彰國軍節度使召為大興尹拜參知政事以母老
乞歸養出判東平河中濟南丁內艱起復擢平章政事
封壽國公為相知大體有敦龐耆艾之目既致政而眷
顧未衰復起判濟南安撫山東便宜行事未幾得請薨
謚文貞配享章宗廟庭

董師中

董師中字紹祖邯鄲人後徙洺州皇統九年進士承安
中入政府直道自立泰和初貴妃李氏方寵幸妃兄奇

爾為宣徽使有楊國忠之權時有田庭方者上書云大臣持祿近臣怙寵章宗覽之顧謂怙寵者誰時奇爾侍立師中倒笏指之曰謂李奇爾輩章宗頷之師中常言作相不難但一心正兩眼明足矣少喜詼諧及在相位未嘗廢談笑然不害為名相俄致仕賜第京師薨

胥鼎

胥鼎字和之代州人大定中進士歷官至參知政事宣宗貞祐二年拜尚書左丞車駕南渡出為平陽節度使

按金史及歸潛志皆作汾陽軍節度使

移知河東南路宣撫使四年授樞

密副使權右丞五年進平章政事莘國公行臺關中未
幾兼左副元帥明年以溫國公致政進封英國行臺衛
州薨於衛鼎在長安日有乞致政表云興造功業方聖
主有為之時表裡山河豈愚臣養安之地其為國一念
可知也

張行中

張行中

按金史張行信初名行忠此作行中與史異

字信甫莒州人大定中

進士衛紹王朝呼沙呼已除名為民賂遺權貴得復用
行中言其必反及弑逆自為太師尚書令澤王行中時
為吏部尚書人謂必為所殺甚危之一日呼沙呼上禮
部鑄監國寶行中持不可呼沙呼雖怒竟不敢殺也興

定元年

按原書作宣宗即位考金史宣宗紀及呼沙呼
傳呼沙呼為太師尚書令封澤王在宣宗即位

之後以朱子綱目書法言之呼沙呼弑君而專其國政
其選官雖出於宣宗之命書以自為亦無不可但先書
此而後書宣宗即位則失事實矣又考張行信傳行信
為叅知政事在興定元年時宣宗即位已五年亦不可
言即位授叅知
政事今改正
授叅知政事丞相高琪專權用事人不

敢仰視惟行中與之抗論朝廷稱焉

路仲顯

路仲顯字伯達

按金史路伯達字仲顯

冀州人其母有賢行教仲

顯讀書成正隆五年進士明昌初授武安軍節度使雲

朔用兵仲顯奉使江左還獻賜幣以佐軍未報而仲顯

死章宗詔以所獻還其家夫人傅氏曰此非吾夫意復

上之有司不聽夫人付之州學買上田二千畝有奇故

相馬琪時判州事聞於朝賜號成德夫人

耶律履

耶律履字履道東丹王七世孫學易通太元至於陰陽
歷數無不精究常以鄉賦一試有司以露索為恥遂不
就舉陰補國史掾章宗朝遷薊州刺史入翰林為修撰
歷直學士待制禮部尚書特賜進士第俄預淄王定策
功拜參知政事明昌元年進右丞相薨謚文獻

王予可

王予可字南雲遼西吉州人父本軍校予可亦常預籍

年三十大病後忽發狂能把筆作詩文及說世外恍惚
事南渡後居上蔡遇文士則稱大成將軍於佛前則稱
諦摩龍什於道家則稱騶天元俊於貴游則稱威錦堂
主人為人軀幹雄偉貌亦奇古戴青葛巾項後垂雙帶
狀若牛耳一金縷環在頂額之間兩頰以青湮之指為
翠鬢衣長不能掩脛故時人有哨腿王之目落魄嗜酒
每入城市人爭以酒食遺之夜宿土室中夏月或屍穢
在旁蛆蟲狼籍不恤也人或問其故事其應如響諸所

引書皆世所無有烹茶詩云簾捲綠陰花外月玉山冰
雪醉扶翁凌霄花詩云啼鳥倒銜金羽舞驚蛇斜傍玉
簾飛張伯玉與之游最狎壬辰兵亂為順天軍將領所
得知其名竊議欲挈之北歸館於州之瑞雲觀予可明
日見將領自言云我不能住君家瑞雲觀也越三日卒
後有見之淮上者

李獻甫

李獻甫字欽用遼西人博通經傳尤長於左氏及地理

之學為人有幹局時人以精神滿腹目之歷咸陽簿行
臺掾屬正大初夏人請和馮子駿往議獻甫預行夏使
有口辨馮無以折之欽用曰夏國與本朝和好百年今
雖易君臣之名而為兄弟之國使兄而輸幣寧有據耶
曰兄弟且不論宋曾與吾家二十五萬足典故具在君
獨不知耶金朝必欲修好非此例不可獻甫作色曰使
者尚忍言耶宋以歲幣餌君家而賜之姓岸然以君父
自居夏國君臣無一悟者倘如宋舊本朝雖歲捐五十

萬無不可使者語塞和議乃定朝廷錄其功授慶陽總帥經歷尋辟長安令入為尚書省掾壬辰用兵奏充行六部員外郎守備之策時相賴之以功遷鎮南軍節度使義宗東巡死於蔡州之難

党懷英

党懷英字世傑奉符人

按金史云
兩邕人

在孕時母夢道士吳

筠來投宿及懷英生儀冠秀整如神仙少穎悟日受千餘言放浪山水間詩酒自娛簞瓢屢空晏如也大定十

年進士甲科調成陽軍事判官累官至翰林學士承旨致仕大定三年九月終是夕有大星隕於所居之堂衆

驚視之而懷英已逝矣趙秉文獻趙秉文作墓誌云按原書於

王子可孝獻甫二傳皆稱其字於亮懷英傳稱懷英為公稱趙秉文為禮部趙公秉文蓋此書文苑諸人傳皆本元好問中州集小傳而畧加更改此數處乃失於更改而尚仍原文者也今並改正以符史體公之

文似歐公不為尖新奇險之語詩似陶謝奄有魏晉篆籀入神李陽冰之後一人而已

趙秉文

趙秉文字周臣滏陽人少穎悟讀書如夙成大定中進士應奉翰林文字上書論宰相胥持國當罷宗室完顏守貞可大用又言獄訟征伐國之大政自古未有君以為可大臣以為不可而可行者坐譏訕免官起為同知寄嵐州轉北京路轉運度支判官章宗嘉其敢言泰和二年改戶部主事翰林修撰兼侍講學士轉侍讀興定中拜禮部尚書同修國史知集賢院天興中卒

按原書天興誤

作開興據

金史改正

周昂

周昂字德卿真定人大定初年二十歲擢第釋褐歷南

和令

按金史及中州集皆云南和簿

遷良鄉令入拜監察御史路宣叔

按路宣叔名鐸此書稱圖克坦克寧為太師濫王稱李純甫為屏山而龐才卿雷希顏辛敬之路宣叔等皆稱字亦皆沿中州集之原文但雜史之體視正史稍寬故姑仍之云以言被斥昂送以詩

坐謗訕停職後任至沁南軍節度同知蒙古軍至城陷

昂與其子嗣明同死於難

按金史及中州集昂拜監察御史路鐸以言事被斥昂送

以詩坐謗訕稿東海上十數年始授翰林修撰出為龍州都軍以邊功名為三司官大安兵興推行六部員外

郎從宗室承裕軍失利逃走上谷城陷與子嗣明
同死此云為沁南節度同知城陷死與文不同

欽定重訂大金國志卷二十九

欽定四庫全書

欽定重訂大金國志卷三十

楚國張邦昌錄

張邦昌字時彥魏州冠氏人也

按宋史云邦昌字子能水滸軍東光人

少

登進士第歷任滄州教授改國子書庫正字通判曹州

宣和元年累遣至尚書右丞改左丞遷中書侍郎當王

黼用事與童貫共啟邊邦昌無所可否於其間時論罪

之徽宗既內禪至靖康元年拜少宰兼中書侍郎我師

既破京城勒令別立異姓令下甚嚴有一人云張邦昌
舊任宰相姑舉之以塞責我師回牒云若果舉邦昌仰
文武百官僧道軍民各親書押字日下等守以備冊禮
時邦昌見在軍前獨中丞秦檜具狀論列以謂邦昌輔
相無狀不能盡人臣之節以釋二國之難不足以代趙
氏情願押赴軍前衆人署名舉邦昌靖康二年三月一
日邦昌入居尚書省令聽百官班迎南薰門邦昌卧病
不食我師令勸進邦昌謂王時雍等曰諸公怕死又擬

送與邦昌耶雖暫假而歸焉能免禍先是正月十五日
邦昌奉使還闕至城外軍前留之及是我師告報城中
欲遣邦昌入城御史臺檢準故例率文武百官迓於南
薰門如期而集者凡數千人士庶往觀者又數萬人范
瑗汪長源等領兵分列左右自州橋及門下森布如織
申刻邦昌入門我師送者及門而返邦昌之入也徑詣
尚書省百官敦請即皇帝位猶豫未決緣軍前先有指
揮故也邦昌與百官相見慟哭盡哀從官卿監郎官十

員晝夜直宿續增作十五員掌管事務并使臣十員祇應三衙亦同宿直我師令勸進於尚書省邦昌卧病不食者四日故有諸公撥送之言次日我國文字至限三日立邦昌不然下城屠戮都人震恐三日我使來促勸進取推戴狀衆人泣勸再三邦昌方從留守司遂以推戴狀申金營欲以初七日行冊命之禮邦昌復誓死不從并欲自殺衆曰相公城外不死今死欲塗炭一城耶遂止初六日闔門制儀榜擇次日即皇帝位是日有內

親事官數百人，以不忍屈節，立異姓殺妻，奴焚居室，謀赴義於金水門外，統制官吳革為首被誅。初七日，百官僧道會於尚書省奉冊寶入門，邦昌涕泣上馬，至西府門，佯為昏憤，欲仆狀立馬。少蘇，復號慟。午時，導引至宣德門西闕下馬，入幕次。復慟我國曾大帥以下五十人持御衣紅繖來，設於幕次。邦昌出次步至御街，禡位望我國拜舞，跪受冊寶。冊文其略曰：失德者亡天命，實假於我手，當仁不讓。歷數乃在於爾躬，咨爾張邦昌云。

可即皇帝位國號大楚都金陵邦昌御紅繖還次訖我
帥揖邦昌上馬出門百官導引如儀邦昌步入自宣德
門由大慶殿前至文德殿前進輦却弗御步升殿於御
床西側別置一椅坐文武合班賀傳指揮云本為生靈
非敢竊位其勿拜王時雍率百官遽拜時雍權領尚書
省吳玠莫儔皆權樞密院呂好問門下侍郎徐秉哲中
書侍郎范瓊以斬吳革功陞正任觀察除殿帥大抵往
來議事者玠儔也逼逐上皇以下者時雍秉哲也脅制

都人者范瓊也遂皆擢用先是我師送邦昌入城時邦昌堅不肯立久之百官有進言於邦昌曰相公且權他日相公為伊呂為王莽皆在相公處之邦昌乃勉強從之曰某以九族保此一城人方邦昌冊立時百官對我帥皆慘怛邦昌亦色喪惟拜傳輩欣然若有所得十二日邦昌手詔曰近迫大國之威俾救斯民於兵火諸公橫見推迫不容於自裁近覽文牒狀牒至有以聖旨稱之夫聖孔子不居則予一人何敢焉應今後有自內傳

出者為中旨有面得者為面旨出四方者為宣旨邦昌
每日於迎陽門上罷去闔門儀制設常禮畢與執政侍
從以上對坐議事語則稱名字遇我使至則遽易服衛
士等曰佞官往日作雜劇每裝假官人今日張大宰作
假官家當邦昌向在我軍前見蕭慶耶律廣王訥高尙
書曹少監等皆鞠躬俯伏不暇至是慶等皆列拜墮下
邦昌辭讓則曰陛下不受臣拜元帥必見罪今日陛下
乃昔日南朝天子也十四日我師以邦昌之請罷括金

銀邦昌來謝與元帥議七事迎接殿下相揖以升致賓
主禮酒三行二十八日二帥回師邦昌僭天子儀衛法
駕縞素出南薰門設香案率百官士庶北望慟哭以二
帝北遷也二十九日邦昌服赭袍張紅蓋乘馬出南薰
門餞別二帥及午而返肆赦至蔡州不行乃收之迎宋
元祐皇后垂簾四月初十日邦昌避位邦昌首尾僭位
三十三日不御正殿不受常朝不山呼見羣臣稱予不
稱朕旨稱面旨由內降則曰中旨宣示四方則曰宣旨

手詔則曰手書至於禁中諸門緘鎖悉題臣邦昌謹封
字樣大抵逼迫我國之命實不敢有僭意也其後死於

潭州初邦昌被貶過潭會寓居州之天寧寺寺中有平

楚樓蓋輒磨沈傳師目傷平楚虞帝魂之句也至是得

宋帝賜死詔徘徊退避執事者迫之乃登樓邦昌仰首

忽覩平楚二字長嘆就縊

欽定重訂大金國志卷三十

欽定四庫全書

史部

欽定重訂大金國志卷三十一至三十七

詳校官庶吉士臣張溥

編修臣裴謙覆勛

總校官舉人臣章維桓

校對官編修臣孫希旦

謄錄監生臣程文炳

欽定四庫全書

欽定四庫全書

豫國劉豫錄

劉豫字彥遊景州阜城人家世為農至豫始應進士舉

為符中登第累官郡縣召除殿中侍御史少時常盜同

舍往白金盃紫紗未及是言者發其夙醜豫因上疏自

明徽宗赦勿問復累章言禮制局事上批云劉豫河北

村叟不識禮制送吏部與差遣遂出為兩浙察訪抵真

州喪妻翟氏繼丁父憂因家馬高宗幸揚州樞密使張
懋與豫有河朔職司之舊力請於朝欲與一郡時濟南
太守張悅遲留未行俾豫起復代之除中奉大夫知濟
南豫欲換江南一郡而兩府厭其煩不許謁見豫懷憾
而去到郡唯務酷刑以快私忿除父子容隱條犯者皆
相坐罪我師至山東豫遣子出戰我師圍之數匝令郡
倅張柬往授我師解去遣人啗豫以利俾令投拜豫與
柬出城百姓攔路守不降豫因出城詣軍前通款是年

夏以豫節制京東兵馬徙東平豫遣使說宋東京留守

上官悟

按原書作上官晤考宋史通鑑綱目及此書太宗紀並作悟今改正

今叛悟焚書

斬使又以賂啗悟左右喬思恭宋厚俾說悟反悟屠之
天會年間濟南有漁得鱧者豫妄謂神物之應乃祀之
夏附豫姦黨言北京順豫門下生禾五穗同本以為豫
受命之符於是齊魯之間僉附會為推戴而豫亦使子
麟齋重寶陰賂尼雅滿左右求僭立尼雅滿遂著意於
豫豫詭辭乞立張孝純太宗遣使就豫治所問軍民百

姓所欲立衆未及對獨鄉人進士張浹越次應曰願立
豫其議遂決是月戊申太宗遣西京雲中府留守高慶
裔禮部侍郎韓昉備禮以璽綬立豫冊之曰冊命爾為
皇帝國號大齊都於大名世修子禮永貢虔誠付爾封
疆並同楚舊豫遂僭立於大名以李孝揚權左丞張東
右丞燕吏侍以子麟提領諸路兵馬知濟南前太原尹
張孝純守尚書右丞以弟益為大名留守王夔為汴京
留守升東平府為東京以汴京為西京以歸德為南京

按宋史云升東平為東京改東京為汴京降南京為歸德府當以史為確 豫生景州守濟南

節制東平僭位大名遂起四郡強壯為雲從子弟應募

者六千人又以境內三代有官或本身有官人為三衛

官曰翊衛曰勳衛曰親衛二年升一等及六年即以試

弓馬合格人出官是時我師南伐回俾李鄴李侁李儔

鄭億年臣於豫豫除儔御史億年工部侍郎冬遣孝純

奉冊寶冊母翟氏為皇太后錢氏為皇后民間房緡以

十分為率五釐納官十一月詔曰王者受命建元以正

始近古以來仍記嘉號以為天下更新乃者即位之初
有司請遵舊制朕以大國之故邈避未遑而使命遠臨
伋立別號以昭受命之元用新我齊民之耳目嘉與諸
夏共承天休其以十一月二十三日為阜昌元年布告
天下咸使聞知李鄴留守東平李儔知單州李侁陽穀
令馮長寧請立十二税法除戶部侍郎是年依倣金國
法鄉各為寨推土豪為寨長五家為保雙丁籍一為軍
月兩點集呈試合格者與補効用正軍不願者聽州縣

民亦各集為伍軍單丁夜巡雙丁上教每調發一人即同保四人備衣甲錢糧等費凡三年一替惟効用正軍官破請給時有百姓醉酒罵豫爾是何人要作官家大宋何負於爾豫斬之滄州進士邢希載上言有大利害乞見豫既召對即言莫若遣使密通江南不然結好西夏為援豫榜於市云上國聞知與生靈為害不細斬首號令

阜昌二年麟封梁國公尚書右丞相張昂權右丞十月

遣弟益守汴京徙李儔知襲慶府十二月東京官屬并
父老吏卒及僧道捧表請遷都詔吏卒補上州文學僧
道賜齋

阜昌三年四月遷都於汴是日暴風卷旗屋瓦震動都
人大恐豫曲赦以安之 奉祖考於舊太廟追尊其祖

為徽祖殺文皇帝父為衍祖睿仁皇帝親巡郊社 遷

弟益為京兆留守 劉麟以所籍鄉民簽為本府十三

軍 按宋史作十五軍 網羅英俊置諸左右嘗語其叅謀馮長寧

等曰趙氏宣政間童蔡爭兵權幕府從事皆闕冗取具
之人一旦金兵入界召問之面色已無主矣諸公宜以
前車為鑒 常博祝簡進遷都賦又進國馬賦其大畧
曰蠡爾蠻荆弗賓弗降固將突騎長驅不資一葦之航
豫手批褒答滅二年磨勘 西京兵士賣玉注椀與三
路都統豫疑非民間物勘鞠之知得於山陵中遂以劉
從為河南淘沙官發山陵中水銀等物以谷俊為汴京
淘沙官發民間埋窖及無主墳墓中物 六月大雨豫

以為德政所感使子麟代謝於相國寺中太乙上清宮

張孝純致仕張昂權右丞相兼門下侍郎鄭億年知

開封府 九月長星見皇太后死諡曰慈獻 宋厚上

書言利害豫以其說上官悟之故特錄用之李俅言什

一稅法利害可採遷監察御史 李鄴權右丞范恭守

左丞

阜昌四年二月葬皇太后於東平儀仗一如朝廷禮所用襍褐皆田家村嫗衣 是月賜狀元羅誘以下八十

四人及第 五月馮長寧許伯通刪什一税法大畧云
宋之季世税法害民權豪兼并元元窮蹙 九月學士
院馬定國進君臣名分論其言指斥南宋尤甚豫批定
國轉一官

阜昌五年四月以許清臣為殿前太尉拆毀景靈宮得
真宗玉石豫碎為二十八段 九月手詔誣汚南朝其
畧曰朕膺受天命撫治中原永惟吳越巴蜀江湖嶺海
皆定議一統之地愍其淪陷不忍用兵且冀久自悔艾

稍能革其不道故為之請於大金欲割江表之地而封之豈圖怙惡不悛蔑棄大德乃敢偽通使聘密圖吞噬先乘不備之隙攻劫汝潁後舉烏合之衆侵掠鄧襄至妄肆蜂薨之毒有取燕雲之謀若尚加含忍則南北生靈何有休息安泰之期是用提督大軍直搗僭壘播告天下明體至懷

阜昌六年正月朔日食豫兵與宋師迎戰齊兵屢敗繼聞宋帝親征烏珠詭示渡江之形全軍宵遁麟以騎兵

環繞一夜馳二百里入宿州始少安西北大恐尋多散

文榜以金帝崩班師 三月改什一法行五税法 又

月毀明堂得金龍之金四百兩大錢三百萬是日天地

晦冥 八月麟出獵陳留義黨百餘人欲擒以南歸事

覺悉斬於汴京 劉復知濟南府劉觀知淮寧軍 十

月民鬻子者官以 闕 稅有告李儔罵丞相張昂口溺降

五官為睢州監酒 十二月張柬卒

阜昌七年春賜狀元邵世矩以下六十九人及第改明

堂為講武殿 九月以許清臣權大總管子麟領東南

道行臺尚書令馮長寧行臺戶部侍郎行軍叅謀李鄴行臺

右丞講武議軍事僉鄉兵三十萬號七十萬分兩路南

寇東路由紫荆山出渦口犯定遠宣化以姪猊統之一

路趣廬州以子麟統之李成孔彥舟闕師古輩皆在魔

下 按通鑑綱目割豫分三道入寇麟率中路由壽春趨
合肥猊率東路由紫金山出渦口孔彥舟率西路由

先州犯六安此書熙宗紀所載亦同此僅
云兩路又云彥舟隸麟麾下疑屬舛誤 手詔榜示指

斥尤甚於五年淮泗之役軍之始行也臨汝軍守宋著

部夫到京麟以後期斬之繼斬使臣趙倚麟因語人曰
已去趙宋矣尋大敗於濠壽之間失軍車七千輜船七
百隻喪器甲交鈔軍需犒設之物不可勝計於是廢狴為
庶人免劉復官徙劉觀為東京留守以妻弟程綸為南
京留守

阜昌八年四月有羣梟鳴於後苑又有鳥數千鳴於內
作休也之聲豫立賞掩捕獲一梟者賞五千 五月無
雲而雷龍起於宣德門左捫滅宣德二字豫遽命修之

八月遣戶部員外郎黃元英監場游何乞師於金井
力南侵皆以宋師進臨長淮為辭既望昌府報喜旗到
稱江南副統制鄭璵等全軍人馬并淮西百姓十萬衆
歸附以戶部侍郎叅謀李師雄充接納官 九月十二
到京以鄭璵為靖難軍節度使知鞏州以劉光時為大
名副總管趙世臣為南京副總管王世忠為前軍統制
斬賞後軍統制自餘授官數十人仍遣馮寧長再來乞
師 十月壬寅平康鎮濠寨官賈闕祥見星殞不覺失

聲曰齊帝星殞矣禍在百日之內同坐者慮他人告首
連累因猝拽赴劉麟問可禳否答曰惟在修德麟奏
其狂壬子斬於汴京十一月以私憾棒死東京富民
孟思齊於東市丙午金帝廢豫為蜀王詔曰敕行臺尚
書省朕丕席洪休光宅諸夏將俾內外悉登成平故自
濁河以南割為鄰壤之界灼見先帝舉合大公罪則過
征固不貪其土地從而變置庶共撫其生靈建爾一邦
迨今八稔尚勤兵戍安用國為寧負而君無滋民患已

降帝號列爵王封罪有所歸余皆罔治將大革於弊政
用一陶於新風勿謂奪蹊田之牛其罪已甚不能托妻
子之友非棄而何凡爾臣民當體至意所有其餘事件
已委所司畫下

初劉豫父子之欲南寇也知帝戒淮蜀之敗不肯輕動
遂妄言南宋將欲寇淮遣黃元英游何乞兵時達喇烏
珠示以難色及酈瓊來歸又令馮長寧以酈瓊等條具
南宋將欲進取事迹聞於金師於是若不得已而從之

俾以齊兵權聽金國節制悉聽調發赴陳蔡宿亳汝潁
之間約麟單騎河頭議事至是麟以鐵騎二百抵濬滑
之間來見達喇我兵圍之數重禽赴汴都由梁門至東
華門入以騎二百守宣德門左右掖門烏珠及五郎君
三路都統入大內邀逼豫出見達喇既至宣德門烏珠
揮鞭以馬騎圍逼至東闕亭命一羸馬載之而去囚於
金明池命百官有司皆仍舊以齊國尚書省為金國行
臺尚書省散出文榜買賣不許關閉仍使人揚言齊主

虐民命廢之放五釐免行錢散鄉軍斃殺貳事人教爾
百姓快活汝舊主人少帝官家在此民心於是稍安而
北軍亦不敢擾民 豫之廢也有馬四萬二千有錢九
千八百七十餘萬緡絹二百七十萬疋金百二十萬兩
銀六千萬兩糧九十萬石方州不在此數豫宮嬪百餘
人妊身者九其子麟婢百二十人父子皆外示節儉而
內為淫佚以獻女獻妻進姊妹得差遣如高立之宋揖
紛紛皆是甚者如庶公謹以女奉麟以妻伴之麟并以

二人進於豫遂以公謹監禮料庫侯湜為長葛令有入
已贓萬餘緡事發知不免以女進豫豫以為使功不如
使過升湜為金牌天使宣傳撫問陝西其汙淫有至於
此在帝位八年剗剗百姓下至倡優無不日納官錢劉
復劉益皆豫之弟劉猷乃劉觀之子悉善聚斂碌碌無
他能獨劉益積而能散待下有禮頗得士卒歡心是故
廢豫日亦忌之用計掩捕金待之若無

闕

恣其

任便居住皇后錢氏宣和間出宮後為賊所掠賣身與

豫為針線婢故宮庭事豫皆取法於錢先是邢希載毛澄之徒皆說豫陰通南朝共雪國恥豫斬之至是廢遷相州留錢五百萬命道流醮薦之十二月自相州徙上

京改封曹王皇統六年死年六十五

按原書不言豫死於何年今據金史

補

欽定重訂大金國志卷三十一

欽定四庫全書

欽定重訂大金國志卷三十二

立楚國張邦昌冊文

維天會五年歲次丁未二月辛亥朔二十一日辛巳皇帝若曰先皇帝肇造區夏務安元元肆朕纂承不敢荒忽夙夜兢兢思與萬國同格於治粵惟有宋實乃通鄰貢歲幣以交歡馳星輶而講好期於萬世永保無窮蓋我有大造於宋也不圖變誓渝盟以怨報德構端怙亂

反義為讐謫紹成俗貪婪不已加以肆行淫虐不恤黎元號令滋彰紀綱弛紊沉所退者非其罪所進者非其功賄賂公行豺狼塞路天厭其德民不聊生而又姑務責人罔知己省父既無道於前子復無斷於後以故徵師命將伐罪弔民幸賴天高聽卑神幽燭細旌旗一舉都邑立摧且天眷攸矚謂之大寶苟歷數改卜未獲偷安故用黜廢以昭元鑒今者國既乏主民宜混同然念厥初誠非貪土遂命帥府與衆推賢僉曰太宰張邦昌

天毓疏通神資睿哲處位著忠良之譽居家聞孝友之名實天命之有歸乃人情之所徯擇其賢者非子而誰是用遣使諸宮都部署尚書左僕射權簽樞密院事韓某等持節備禮以璽冊命爾為皇帝以搜斯民國號大楚都於金陵自黃河以外除西夏封圻疆場仍舊世輔王室永作藩臣貢禮時修爾勿疲於述職問音歲致我無緩於推誠於戲天生蒸民不能自治故立君以臨之君不能獨理故樹官以教之乃知民非后不治后非賢

不守其於有位可不慎與予懋乃德嘉乃丕績日慎一日雖休勿休欽哉其聽朕命

立齊國劉豫冊文

維天會八年歲次庚戌七月

按原書無七月二字據程文所載補

辛丑朔

二十七日丁卯皇帝若曰朕聞公於御物不以天位為己私職在救民迺知王者為通器威罰既已殄罪位號宜乎授能迺者有遼運屬顛危數窮否塞獲罪上帝流毒下民太祖武元皇帝仗黃鉞而拯黔黎舉白旄而矜

師來妖氛既掃區宇式寧越有宋人來從海道願輸歲
幣祈復漢疆太祖方務善鄰即從來議豈期天方肇亂
自起釁階陰結叛臣賊虐宰輔鳩集姦慝擾亂邊陲肆
朕纂承仰循先矩姑存大體式示涵容乃復蔽匿逋逃
誇大疆域肆其貪狠自起紛爭擾吾外屬之藩隣取其
受賜之鄉土因彼告獲遂與解和終無聽從巧為辭拒
爰命將帥敦諭盟言許以自新全然不改偏師傅汴首
罪奔淮嗣子哀鳴請復歡好地畫三鎮誓卜萬年凡有

質委悉同父約既而官軍未退夜集衆以犯營誓墨未
乾密傳檄而堅壁私結人使陰起事端以故再遣師徒
詰茲敗類又起畫河之議復成款戰之謀既昧神明乃
貽元鑿京城摧破鼎祚淪亡無并爾疆以示不貪之德
止遷其主用彰罰罪之心建楚新封守宋舊業不料庸
懦難勝重任妄為退讓反陷誅鋤銜命出和已作潛身
之計提兵入衛反為護己之資忍視父兄甘為俘虜事
不克濟人豈無情方在殷憂樂於僭號心之幸禍於此

可知乃遣重兵連年討捕旋聞遠竄越在島夷

按自無并爾獲

至反陷誅鋤言立張邦昌事自銜命出和以下至此乃言宋高宗事中間必有斥言高宗數語而此書及程史

載此冊文皆無之蓋宋人諱而削之故致文義上下銜決重念斯民亂離無主久懼

塗炭未遂昭蘇不委仁賢就能保庇咨爾中奉大夫京

東京西淮南等路安撫使兼諸路馬步軍都總管知東

平府節制大名府開德府濮博濱棣德滄等州劉豫夙

擅敢言之譽素懷濟世之才居於亂邦生不偶世百里

雖智亦奚補於虞亡三仁至高或願從乎周仕

按原書昭蘇作

招蘇偶世作遇世周仕
作國仕並據程史改正當姦賊擾攘之際愚氓去就之

間舉郡來王奮然獨斷達乎厯試厥勲克成委之安撫
而德化行任之尹牧而獄訟理付之總戎則盜賊息授
之節度則郡國清况有定衰救亂之謀安變持危之策
使民無事則橐弓力穡有役則釋耒荷戈罷無名之征
廢不急之務徵隱逸舉孝廉振紀綱修制度省刑罰而
黜煩酷發倉廩而息蠹螟神人以和上下協應比下明
詔詢考輿情列郡同辭一心仰戴宜即始歸之地以昭

建業之元是用遣使留守西京特進檢校太保尚書右
僕射大同尹燕山西兵馬都部署上柱國廣陵郡開國
公食邑二千戶食實封二百戶高慶裔副使金紫崇福
大夫尚書禮部侍郎知制誥護軍南陽縣開國侯食邑
一千戶食實封一百戶韓昉備禮以璽綾寶冊命爾為
皇帝國號大齊都於大名府世修子禮永貢虔誠付爾
封疆並從楚舊更須安集自適攸居爾其上體天心下
從民欲忠以藩王室信以保邦圻惟天難謀惟命靡常

常厥德保厥位爾其勉哉勿忽朕命

檢視大宋庫藏

絹五千四百萬疋 大物段子一千五百萬疋 金三

百萬錠 銀八百萬錠 珍寶未見實數

取至大宋印寶

皇帝殿寶十四

承天休延萬億永無極 受命于天既壽永昌 天

子之寶 天子行寶 天子信寶 天子神寶 皇

帝之寶 皇帝行寶 皇帝信寶 御書之寶 御
書之印 無字寶 皇帝恭膺天命之寶 宣和御

書之寶

皇帝殿青玉印寶二

皇帝恭膺天命之印 傳國寶

皇帝殿金寶九

御前之寶 宣和殿寶 御書之寶 天下同文之

寶 天下合同之寶

印中書下
省文字

御前之寶

印宣
劄

御前錫賜之寶

印賜月
茶藥石

書詔之寶

印詔
書

皇帝欽

崇國祀之寶

印香合
詞表

天子殿銀印一

尚書內省出納之印

印破
際

皇后殿金寶一

皇后之寶

太子殿金寶一

皇太子寶

太子妃金印一

太子妃印

宋族隨二帝北遷

皇后皇太子親王玉妃王子宗姬

太上道君皇帝太上皇后 欽宗皇帝欽宗皇后

皇太子 謀

鄆王楷 夫人朱氏 王子三人 女宗姬六人

肅王樞 夫人任氏 王子二人 女宗姬二人

景王祀 夫人田氏 女宗姬二人

濟王榘 夫人曹氏 康王構出外 夫人邢氏

祁王模 夫人曹氏 莘王植按原書誤作 夫人

嚴氏

徐王棣 夫人王氏 沂王桴按原書訛作祁

和王棫按宋史徽宗子蜀王名棫和王 信王榛

未出閣皇子

安康郡王榷番貴 建安郡王模任 嘉國公倚

任婉
容位

瀛國公樾

喬貴
妃位

溫國公棟

小玉
好位

相國

公榘

王貴
妃位

昌國公柄

王婉
容位

儀國公桐

大王
好位

韓國公相

閻婉容位。○按宋史徽宗三十一子一為
欽宗六人早薨不及靖康之難餘有二十

四人此所列僅二十人又史無韓國公相而有蜀王
及英國公榘潤國公樾儀國公樾廣平王郡王榘皆
此書所不載陸游老學菴筆記云靖康國破廣平郡
王榘匿民間有從官餽以食為人所發亦不免據此
則廣平王榘實同北遷其餘史之
所有而此書不載者蓋皆脫漏耳

已出降帝姬

嘉德帝姬

都尉
曹寅

安德帝姬

都尉
邦光

崇德帝姬

都尉

欽定四庫全書



欽定重訂大金國志

卷三十二

八

漢

茂德帝姬

都尉恭

成德帝姬

都尉方

洵德帝

姬

都尉田丕

順德帝姬

都尉向子辰

顯德帝姬

都尉劉文彥

未出降帝姬

華福帝姬

喬貴妃

惠福帝姬

喬貴妃

令福帝姬

王婉容

純福帝姬

小王婕妤

寧福帝姬

崔美人

永福帝姬

崔美人位

柔福帝姬

崔王莘位

諸妃嬪

王貴妃

喬貴妃

韋貴妃

王貴妃

王婉容

閻婉容 任婉容 王婕妤 喬婕妤 小王婕妤

五王宮妃嬪共一千二百人

燕王倬

越王偲

按原書作燕王偲越王倬今據宋史改正

吳王佖

和義郡王偉

按宋史神宗子有吳王佖儀王偉靖康時吳王佖已薨其子有奕封和義郡王

此云和義郡王偉外誤之甚

永寧郡王有恭

按永寧郡王原書不著其名考宋史

永寧郡王神宗子楚王似之子名有恭今據補

欽定重訂大金國志卷三十二

欽定四庫全書

欽定重訂大金國志卷三十三

天文

國初用兵行師未知有時日支干孤虛王相之法天文之官亦未備自後割遼疆之半始得遼之太史如特布莽威嘉們三數人皆明天文占驗數中始有挈壺供奉等官方幹里雅布南下之際宋徽宗內禪太史占帝星復明大驚欲回郭藥師時在燕山謂南朝未必有備不

如姑行其後京城之圍金太史占十一月二十五日午時宋京城當破後果然

地理

國初族帳散居山谷地僅千餘里自後并遼得大遼全盛之地其後深入中原舉大江以北皆有之疆宇始廣矣其初居草地名會寧號上京僻在一隅海陵王始徙燕遂以渤海遼陽府為東京山西大同府為西京中京大定府為北京東京開封府為南京燕山為中都號大

興府即古幽州也其地名曰永安金國之盛極於此矣

燕京制度

國初無城郭星散而居呼曰皇帝寨國相寨太子莊後
升皇帝寨曰會寧府建為上京其遼之上京改作北京
城邑宮室制度草創居民往來車馬雜遝自前朝門直
抵後朝門盡為往來出入之路每孟春擊土牛父老士
庶無長幼皆聚觀於殿側民有訟未決者多邀駕以訴
至熙宗始有內庭之禁煬王弒熙宗築宮室於燕建三

年而後成城之四圍凡九里三十步自天津橋之北曰
宣陽門中門繪龍兩偏繪鳳用金釘釘之中門唯車駕
出入乃開兩偏分雙隻日開一門過門有兩樓曰文曰

武文之轉東曰來寧館武之轉西曰會同館

按苑成大石湖集云

會同館燕山客館也周必大思陵錄云來寧館泛便之館也

正北曰千步廊東西對

馬廊之半各有偏門向東曰太廟向西曰尚書省至通
天門後改名應天樓高八尺朱門五飾以金釘東西相
去一里餘又各設一門左曰左掖右曰右掖掖內城之

正東曰宣華正西曰玉華北曰拱辰及殿凡九重殿凡三十有六樓閣倍之正中位曰皇帝正位後曰皇后正位位之東曰內省西曰十六位乃嬪妃居之西出玉華門曰同樂園若瑤池蓬瀛柳莊杏村盡在於是都城四圍凡七十五里城門十二每一百分三門其正門四旁又設兩門正東曰宣曜陽春施仁正西曰灝華麗澤彰

義正南曰豐宜景風端禮正北曰通元會城崇智此四

城十二門也

按此書與張棣金圖經皆云燕京十二門
金史地理志城門十三北四門一曰光泰

欽定四庫全書

欽定重訂大金國志

卷三十三

三

當以史
為確

此外有宣陽門即內城之南門也上有重樓制
度宏大三門並立中門常不開唯車駕出入通天門即
內城之正南門也四角皆採樓瓦皆琉璃金釘朱戶五
門列焉門常扃惟大禮祫享則由之宣華乃內城之正
東門玉華正西門也左掖東偏門右掖西偏門也各有
武夫守衛士夫過者不敢瞬目拱辰即內城正北門也
又曰後朝門制度守衛一與宣華玉華等金碧翬飛規
模壯麗矣

汴京制度

汴京制度宣宗所遷大槩依宋之舊宋鄒伸之奉使時同官屬遊故宮宮牆四角皆有樓高五尺每樓一所兩旁各有屋以裏牆角自左掖門向西三十步橫入一門號左昇龍門入此門即大慶門外由峻廊上俯闕城市

正望丹鳳樓後下樓即右昇龍門

按左昇龍門右昇龍門
金史地理志作左

昇平門右
昇平門

此兩門通左右掖門橫通大慶門外其門有

三中曰大慶東曰日精西曰月華門旁皆列戟入此門

望見大慶殿殿前有兩樓對峙東曰嘉福西曰嘉瑞大慶殿屋十一間龍墀三級旁朵殿各三門峻廊後與兩廡相接殿壁畫四龍各長數丈乃宣宗渡河後畫中有御畫小龍用拱斗闌成一方井如佛正殿蓋中有一金龍以絲網罩之此正衙也轉御屏下峻堦數步一殿曰

德儀殿有三門中曰隆平左曰左隆平右曰右隆平

金按

史地理志云東曰左昇龍門西曰右昇龍門正門曰隆德入此門東西兩井望見隆

德殿即宋垂拱殿也殿庭中東一鐘樓西一鼓樓殿屋

五大間旁各殿三間階上龍墀一級東西兩閣門並樓
屋下有門通往來此常朝殿也此殿後又一庭院有門
曰仁安東西兩門東出東華門西出西華門入仁安門
望見仁安殿龍墀兩廊皆如隆德殿規模即宋集英殿
也自此後兩殿有門皆有丹軒連接兩邊廊屋止是黑
漆窻戶意謂必宮人居於此非內殿百官不到前四殿
皆琉璃筒瓦一殿曰德和按金史作純和一曰福寧後又有一
小殿殿後有直舍此殿後即內宮牆門有仁智殿溪中

有龍舟仁智殿下兩巨石高三丈廣半之東一石有小
碑刻勅賜昭慶神運萬歲峯西一石刻獨秀太平巖乃
宋徽宗御書刻石填金殿後有石壘成山高百尺廣倍
之最上刻石曰香石泉山山後挽水上水自上流下至
荆玉澗又流至湧翠峯下有太山洞水自洞門飛下復
由本路出德和殿迤邐至大慶門外橫從右昇龍門出
即宋後朝門榜曰啟慶之宮入宮門後有三門中曰德
昌左曰文昭右曰光興制度宏麗金碧輝映不可勝言

出啟慶門復入右昇龍門過大慶門外出左昇龍門向
東行一門向南榜曰聖壽宮左安泰門右明昌門即金
國太后宮入宮門直入一門榜曰徽音又一門榜曰光
熙望見徽音殿長樂殿入光翼門繁禧門有德壽殿復
出此宮即秘閣在左掖門之西五門之東即古待漏院
自五門望南向丹鳳門中間禁路兩廊千步廊盡處向
東一屏牆向南一大門即太廟門內三門門上並畫蟠
龍殿宇二十五間高大宏麗兩旁修廊東西各開一門

與廊相通蓋百官陪位入此兩門甚便殿上十二室盡榜金國祖宗謚號每一室計三間東邊一門西邊一窻嵌以小石室上下有石廣三丈石門一合可開閉係藏神主處遇祭祀迎神主出石室祭畢復藏殿宇出太廟向西行向南一門即社壇周圍皆牆外四門遇祭則開迎四方之氣宮室制度金國時有更改大抵皆宋朝之舊也

陵廟制度

金初不設宗廟自平遼後執政大臣言天子之孝在尊
祖尊祖之事在建宗廟遂立太廟迨海陵王徙燕再起

太廟標名曰衍慶之宮奉安太祖太宗德宗又其東曰

元廟奉安元祖大聖皇帝楊格

按金史楊格追諡孝平
皇帝廟號穆宗不言有

元祖大聖皇帝之號又景祖之子九人而嗣立者三人
為世祖肅宗穆宗而世祖之功業尤盛自太祖以下又
皆世祖子孫不應舍世祖而祀穆宗蓋此書誤以太祖
為穆宗之子而脫去世祖肅宗康宗三代則此言元祖
大聖皇帝必係世祖而誤以為穆宗也史言世祖天會
十五年追諡聖肅皇帝廟號世祖皇統五年增諡神武
聖肅皇帝亦不著元祖大聖之號疑此係海陵
時所更諡號至世宗旣復舊號改史不載耳

追尊遼

祖起自九代堪布以下各加尊諡

按金史金自始祖以下皆天會十五年追

尊加以諡號至皇統又嘗增加據此則海陵時又嘗增更諡號而金史不載蓋必世宗時復用舊號故不見於

史耳立廟祭祀國初祖宗止葬於護國林之東遼海陵徙

燕始令司天臺卜地於燕山之四圍歲餘方得良鄉縣

西五十里大洪谷曰龍城寺峯巒秀出林木隱映遂遷

祖宗於此唯熙宗葬於山陰以其刑餘遂不入陵國初

無郊祀之禮至海陵徙燕太廟元廟告成始有尊祖之

議時奏議多陳郊祀配天之事海陵令簡便討論禮官

儀衛

建國之初儀衛護從甚簡至熙宗立始設護衛將軍寢
殿實達爾弩手織子迨幸燕始乘玉輅服袞冕儀從整
肅時令翰林待制邢具瞻作引導詞曰五年一狩仙仗
到人間稼穡艱難蒼生眼洗秋光裡今日見天顏金瓜
玉斧沉烟和舞蹈六龍閒歌謳道詠皆相似天子壽南
山護從悉具若尋常出獵觀田多無定制或數百騎或
千騎前後皆執旗旗上繪以日月御座織或紅或黃如

或排駕而出一與南朝同尊前者皆弩手繖子其人各長六尺八寸衣以真錦團花袍金鍍銀帶簇金蛾拳脚幘頭雙引而前皆散手及半方有執旗者約千餘隊旗之後曰駕頭駕頭之後曰護衛將軍皆衣紫窄袖衫金帶幘頭腰弓矢並馬而行約數百至曲蓋其形六角紅羅曲柄飾以文彩一護軍執之以為儀式蓋之後曰御座馬左右二副點檢領之馬之後曰寢殿實達爾衣帶乘騎一與護衛等止無弓矢而腰以深紅包袱又約數

百及駕或乘逍遙或乘步輦或乘馬臨時取旨其上張
蓋表裏皆紅羅獨微曲駕之後護衛實達爾不計其數
又其後曰馬軍枋棹隊數千隨馬

欽定重訂大金國志卷三十三

欽定四庫全書

欽定重訂大金國志卷三十四

旗幟

金以水德王凡用師行征旗皆尚黑雖五方皆具必以黑為主尋常車駕出入止用一日旗與后同乘則加月旗二旗相間而陳或數百隊或千餘隊日旗即以紅綃為日刺於黃旗上月旗即以素帛為月刺於紅旗上近御則又有日月大綉旗二如大禮袷享冊封一循古制

旗無大小皆備焉然五方五星五嶽青龍白虎朱雀元
武神鳳外又有五星聯珠一日月合璧一象二天王二
海馬二鷹隼二太白二近御又張一大旗其制極廣錯
繪神物以猛士執之傍有數十人護之各施大繩以備
風勢名曰蓋天

車繖

后妃並用殿車其車如五花樓之狀上以錦綠青氊為
蓋四圍以簾秋冬亦用氊並用錦綠柱廊月板護泥皆

飾以金玉或四輪或兩輪並朱色車之四角后用金鳳
妃用金孔雀如一品二品車之四角並用銀螭頭

皇帝織或紅或黃無定以金龍為頂蓋后用金鳳太子
用金龍妃紫織用金孔雀一品青織用銀浮圖二品三
品用紅浮圖四品五品用青浮圖

服色

服色各以官品論如五品官便可服五品服如武臣至
四品皆橫金文臣則加魚不待錫賜而許自服焉皇帝

視朝服純紗幘頭窄袖赭袍玉區帶黃滿頭如遇祭祀
冊封告廟則加袞冕法服平居閒暇皂巾雜服與士庶
無別

太子服純紗幘頭紫羅寬袖袍象簡玉帶佩雙玉魚
王公服謂親王及三公服紫羅寬袖袍紗製幘頭象簡
玉帶佩玉魚

正一品謂左右丞相左右平章事開府儀同三司服紫
羅袍象簡玉帶佩金魚

從一品謂左右丞左右參知政事崇進特進樞密院使
服紫羅袍象簡金帶佩金魚

二品謂自金紫光祿大夫至榮祿大夫服紫羅袍象簡
御仙金帶佩金魚

三品至四品謂文臣資德大夫至少中大夫武臣龍虎
衛上將軍至懷遠大將軍並服紫羅袍象簡荔枝金帶

文臣則加佩金魚

按原書少中大夫作中大夫懷遠大將軍作定遠大將軍據後千官品列

及金史百官志改正又按金史輿服志三品笏頭纒
文金帶三品四品荔枝或御仙花金帶與此不同

五品謂文臣中議大夫

按原書作中散大夫據後千官品列及金史改正

至朝

列大夫武臣廣威將軍至宣武將軍

按金史百官志從五品下曰宣武將

軍與此合而此後所載千官品列從五品顯武將軍為下未知孰是

並服紫羅袍象笏紅

鞞烏犀帶文臣則帶金魚

六品至七品謂文臣奉政大夫至儒林郎武臣武節將

軍

按原書作武功將軍據後千官品列及金史改正

至忠顯校尉文臣則服緋

武臣則服紫並象笏紅鞞烏犀帶文臣佩銀魚

八品至九品謂文臣文林郎至登仕佐郎

按原書作將仕郎據千官

品列及金史文從九品
至將仕佐郎止今改正
武臣忠勇校尉至進義副尉
按原

書作進義校尉據千官品列及百官志
武臣九品至進義副尉止今改正
文臣則服綠武臣

則服紫並象笏黑鞞角帶

千官品列

諸國王府號

大府趙王府等名二十
次府燕王府等名三十

小府諸王府等名三十
按金史尉王小國三十漢遼道定景甲崇宿昔昔鄂師舒

潘邸萊郎都祀向管密詐任戴鞏
蔣蕭莘芮而無諸王諸字有誤

宮師府掌保護東宮尊以德義

太子太師 太子太傅 太子太保

太子少師 太子少傅 太子少保

詹事院總統東宮內外庶務

太子詹事 太子少詹事 太子左衛率府率

右衛率府率

掌周衛導從儀仗之事

太子左監門

太子右監門

掌門衛禁鑰

太子僕正 太子副僕正

太子僕丞

掌車馬廐牧弓箭鞍轡

太子掌寶二人

掌奉寶謹其出入

太子典儀

太子贊儀

掌司贊禮儀

太子侍正

太子侍丞

掌冠帶衣服左右給使之事

太子典食令

太子典食丞

掌承奉膳羞

太子侍藥

太子奉藥

掌承奉醫藥

太子掌飲令

太子掌飲丞

掌承奉湯茶酒果之事

太子家令

太子家丞

掌管繕栽植鋪設燈燭之事

太子司經

太子副司經

掌經史圖書筆硯事

太子司藏

太子副司藏

掌康藏財貨出入事

太子司倉

太子副司倉

掌倉廩出納及薪炭等事

太子中侍局都監

同監

掌東宮閤內禁令及省察宮人廩給諸物

太子左諭德

右諭德

左贊善

右贊善

掌贊諭道德侍

從文章

親王府屬官

王傅

掌師範輔導參議可否親王外任兼京府節鎮同知同知。按原書以親王在外任兼京府節鎮同

知列於府尉之下另為一職考金史百官志王傅掌師範輔導參議可否若親王在外亦兼本京節鎮同知蓋謂諸王若在外為諸京留守及節鎮則其為王傅者亦隨王出而為同知之官也原書舛誤今改正

府尉

掌警展侍從

司馬

掌總統本府之事

文學

掌贊導禮儀資廣學

問

諸駙馬都尉

公主府府名

金源 廣平 平原 南陽 常山 太原 平陽

東平 安定 延安

按金史封王郡號十金源廣平平原南陽常山太原平陽

東平安定延安封公主縣號三十樂安清平蓬萊
安棲霞壽光靈仙壽陽鍾秀惠和永寧慶雲靜樂福
山隆平德平文安福昌順安樂壽靜安靈壽大寧聞
喜秀容宜芳真寧嘉祥金柳華原此書誤以封王之

即跪為公主之號今姑仍舊文
而附識金史之文以正其繆

內命婦品

貴妃

淑妃

德妃

賢妃

俱係一品
即四妃也

昭儀

昭

容 昭媛

修儀

修容

修媛

充儀

充容

充媛

俱係二品
即九嬪也

婕妤九員

係三品

美人九員

係四品

才人九員

係五品即二十七世婦也

寶林二十七員

係六品

御女二十七員

係七品

采女二十七員

係八品即八十一御妻也

女官職員通記六尚局內共該女職一千餘員

尚宮 尚儀 尚服 尚食 尚寢 尚功

外命婦品

大長公主 長公主 俱係正一品 郡主 係從一品 縣主 係正

品二

東宮命婦品

良娣二員 係三品 良媛二員 係四品 承徽十員 係五品

昭訓十六員 係七品 奉儀二十四員 係九品

東宮女官職員

宮正 司正 典正 女史

文官

開府儀同三司

儀同三司

係正一品

特進

崇進

係俱

從一品。按金史文階二十有四。從一品上曰開府儀同三司。中曰儀同三司。中次曰特進。下曰崇進。此書以開府儀同三司儀同三司為正一品。特進崇進為從一品。與史異。然自二品以下皆有正有從。則一品不應無正。此書可以訂金史之誤。

金紫光祿大夫

銀青光祿大

夫 俱係正二品

光祿大夫

榮祿大夫

俱係從二品

資德

大夫 資政大夫

資善大夫

俱係正三品

正奉大夫

通奉大夫

中奉大夫

俱係從三品

正議大夫

通

議大夫

嘉議大夫

俱係正四品

大中大夫

中大夫

少中大夫

俱係從四品

中議大夫

中憲大夫

中

順大夫

俱係正五品

朝請大夫

朝散大夫

朝列大

夫

俱係從五品

奉政大夫

奉議大夫

俱係正六品

奉直

大夫

奉訓大夫

俱係從六品

承德郎

承直郎

俱係正七品

品

承務郎

儒林郎

俱係從七品

文林郎

承事郎

俱係正八品

從政郎

從仕郎

俱係從八品

登仕郎

將

仕郎

俱係正九品

將仕佐郎

登仕佐郎

俱係從九品

武官

開府儀同三司

儀同三司

係正一品

特進

崇進

俱係

從一品

金紫光祿大夫

銀青榮祿大夫

俱係正二品

光祿大夫

榮祿大夫

俱係從二品

龍虎衛上將軍

驃騎衛上將軍

金吾衛上將軍

俱係正三品。○按金史正三品中曰

金吾衛上將軍下曰驃騎衛上將軍

奉國上將軍

輔國上將軍

鎮國上將軍

俱係從三品

昭武大將軍

昭毅大將軍

昭勇大將軍

俱係正四品

安遠大將軍

定遠大將

軍 懷遠大將軍

俱係從四品

廣威將軍

明威將軍

宣威將軍

俱係正五品。按金史正五品。上曰宣威將軍。下曰明威將軍。

信武

將軍

按原書誤作信威將軍。據金史改。

宣武將軍

顯武將軍

俱係

從五品。按金史從五品。上曰顯武將軍。下曰宣武將軍。

武節將軍

武德將

軍

俱係正六品

武義將軍

武畧將軍

俱係從六品

承信

校尉

昭信校尉

俱係正七品

忠武校尉

忠顯校尉

俱係從七品

忠勇校尉

忠翊校尉

俱係正八品

修武校

尉 敦武校尉 俱係從八品 保義校尉 進義校尉

俱係正九品 保義副尉 進義副尉 俱係從九品

司天

自司天太醫內侍教坊官各立二十五階止於從四

品其服色品第與文武官同惟不佩魚 若遇佩魚過正官者亦同

文武官佩魚

欽象大夫 欽授大夫 正儀大夫 俱係從四品

中曰正儀大夫 下曰欽授大夫 靈憲大夫 明時大夫 頒朔大

夫

俱係正五品

雲紀大夫

協紀大夫

保章大夫

俱係

從五品

紀和大夫

司元大夫

俱係正六品

探賸郎

授時郎

俱係從六品

究微郎

靈臺郎

俱係正七品

明緯郎

候儀郎

俱係從七品○按原書誤作候義郎今據金史改正

推策郎

按原書誤

作推測郎今據金史改正

司正郎

俱係正八品

校景郎

平秩郎

俱係從八品

正秩郎

按金史作正祀郎

挈壺郎

俱係正九品

司

厯郎

司辰郎

俱係從九品

太醫

保宜大夫

保康大夫

保平大夫

俱係從四品

保願

大夫

保安大夫

保和大夫

俱係正五品

保善大夫

保嘉大夫

保順大夫

俱係從五品

保合大夫

保冲

大夫

俱係正六品

保愈郎

保全郎

俱係從六品

成正郎

成安郎

俱係正七品

成順郎

成和郎

俱係從七品

成

愈郎

成全郎

俱係正八品

醫全郎

醫正郎

俱係從八品

醫效郎

醫候郎

俱係正九品

醫痊郎

醫愈郎

俱係

從九品

内侍

中散大夫 中尹大夫 中侍大夫 中列

俱係從四品

大夫 中御大夫 中儀大

按原書作中衛大夫今據金史百官志改正

夫 中常大夫 中益大夫 中衛大夫

俱係正五品

俱係

品 從五 中良大夫 中涓大夫

從五品

按金史云天德作中亮

俱係正六品

通禁郎 通侍郎 通掖郎 通御郎

俱係從六品

俱係

品 正七 禁直郎 侍直郎 掖直郎 内直

正七品

俱係從七品

郎 司贊郎 司謁郎 司閤郎

俱係正八品

俱係從八品

司僕郎

俱係正
九品

司奉郎

司引郎

俱係從
九品

教坊

雲韶大夫

仙韶大夫

成韶大夫

俱係從
四品

章德

大夫 長寧大夫

德和大夫

俱係正
五品

景雲大夫

雲和大夫

協律大夫

俱係從
五品

慶善大夫

嘉

成大夫

俱係正
六品

肅和郎

純和郎

俱係從
六品

舒和

郎 調音郎

俱係正
七品

比音郎

司樂郎

俱係從
七品

典樂郎

協樂郎

俱係正
八品

掌樂郎

和樂郎

俱係
從八

品

司音郎

司律郎

俱係正九品

和聲郎

和節郎

俱係從九品
凡八階
今據金史補

欽定重訂大金國志卷三十四